

Jenasis

Ola Basdamwan Stori

God bin meigim ebrijing

Jen 1 – 2:4


Storimen: ^{1,2} Orait, longtaim wen God bin stat meigimbat ebrijing, nomo enijing bin jidan. Imbin jis eniwei, nomo garram enijing. Oni strongbala woda bin goran goran ebriwei, en imbin brabli dakbala, en det spirit blanga God bin mubabat ontop langa det woda.

God: ³“Lait!”

Storimen: En streidawei det lait bin kamat.⁴ En wen God bin luk det lait bin gudwan, imbin gudbinji.

⁵ Brom deya God bin kadimat det lait brom det dakbala, en imbin gulum det lait Deitaim, en imbin gulum det dakbala Naitaim.

Wanbala wok garra peipa.



Brom deya naitaim bin gowei, en wen imbin ailibala, imbin det sekan dei na.

God: ⁶Larram samting jidan blanga kadimat det woda en meigim det woda jidan miselpmiselp.*

Storimen: ⁷ En imbin hepin lagijat na, dumaji God bin meigim det ting, en det ting bin kadimat det woda langa bodam brom det woda langa top,⁸ en God bin gulum det ting Skai.

Wanbala wok garra peipa.



Brom deya naitaim bin gowei, en wen imbin ailibala, imbin det namba 3 dei na.


God: ⁹ “Larram det woda langa bodam hipimap miselp langa wan pleis blanga meigim draiwan kamat.”

Storimen: En imbin hepin lagijat na, ¹⁰ en God bin gulum det draiwan pat Graun, en imbin gulum det woda weya bin hipimap miselp langa wan pleis Solwoda. En wen God bin luk ebrijing bin gudwan, imbin gudbinji.

God: ¹¹ Larram det graun growimap olkain tri en gras en purdiflawa, sambala garram sid daga en sambala garram frut daga.

Storimen: En imbin hepin lagijat na, ¹² en det graun bin growimap olkain tri en gras en purdiflawa. En wen God bin luk ebrijing bin gudwan, imbin gudbinji.

Wanbala wok garra peipa.



¹³ Brom deya naitaim bin gowei, en wen imbin ailibala, imbin det namba 4 dei na.

God: ¹⁴ Larram olkain lait kamat langa top blanga kadimat deitaim brom naitaim, en detlot lait garra shain blanga shoum wotaim ola difrinwan dei en ola difrinwan sisan en ola difrinwan serramoni garra stat, ¹⁵ en detlot lait garra shaindan brom det skai blanga gibit lait oloba langa dijan wel.

Storimen: En imbin hepin lagijat na, ¹⁶ en God bin meigim dubala bigwan lait. Imbin meigim san blanga deitaim, en imbin meigim mun blanga naitaim, en imbin meigim bigismob sta du, ¹⁷ en imbin pudum ol detlot lait langa skai blanga shaindan oloba langa dijan wel, ¹⁸ en imbin pudum olabat deya blanga jidan deitaim en naitaim en blanga

kadimat det lait brom det dakbala. En wen imbin luk ebrijing bin gudwan, imbin gudbinji.

Wanbala wok garra peipa.



¹⁹ Brom deya naitaim bin gowi, en wen imbin ailibala, imbin det namba 5 dei na.

God: ²⁰Larram olkain fish en enimul jidan langa woda, en larram ola bard flaiflai langa skai.

Storimen: ²¹En God bin meigim ola difrinkain fish en enimul blanga jidanbat langa woda en imbin meigim sambala brabli bigwan enimul blanga jidanbat insaid langa det solwoda, en imbin meigim olkain difrinwan bard blanga flaiflai langa skai. En wen imbin luk ebrijing bin gudwan, imbin gudbinji. ²² Imbin gudbinji blanga ol detlot fish en enimul, en imbin dalim olabat blanga meigim miselp bigmob en bilimap det woda, en imbin dalim ol detlot bard blanga meigim miselp bigmob du.

Wanbala wok garra peipa.



²³ Brom deya naitaim bin gowi, en wen imbin ailibala, imbin det namba 6 dei na.

God: ²⁴ Larram olkain enimul jidan langa dijan wel. Larram jidan olkain kwaitwan enimul en olkain wailwan enimul en olkain enimul weya wokabat garam binji langa graun.

Storimen: ²⁵ En imbin hepin lagijat na, dumaji God bin meigim ol detlot enimul. En wen imbin luk ebrijing bin gudwan, imbin gudbinji.

²⁶ Brom deya God bin dalim miselp,


God: Wi lafta meigim pipul na. En wi lafta meigim olabat laik wi blanga jidan laik wi. Olabat garra jidan bos blanga ola fish en bard en blanga ola kwaitwan enimul en ola wailwan enimul en blanga ol detlot enimul weya wokabat garam binji langa graun.*

Storimen: ²⁷Brom deya God bin meigim dubala pipul laik imself. Imbin meigim boiwan en gelwan,* ²⁸ en imbin tok gudbinjiwei langa dubala,

God: Yunbala garra abumbat bigmob biginini, dumaji yunbala garram loda kantri blanga jidanbat. En detlot biginini blanga yunbala garra go ebriweya langa ola kantri en meigim miselp bos blanga detlot kantri, dumaji mi na meigim yumob bos blanga ola fish en ola bard en ola enimul.* ²⁹ En blanga yumob daga ai gibit yumob olkainaba sid daga en frut daga blanga dagadagat. ³⁰ En blanga ola enimul en ola bard ai gibit olabat gras en bushis blanga dagadagat.

Storimen: Wal ebrijing bin hepin lagijat na jis laik weya God bin tok. ³¹ En God bin luk ol detlot ting weya imbin meigim, en imbin brabli gudbinji, dumaji ol detlot ting bin brabli gudwan.

Wanbala wok garra peipa.



Brom deya naitaim bin gowei, en wen imbin ailibala, imbin det namba 7 dei na.

2:1 Wal lagijat na God bin meigim ebrijing. ² En langa det namba 7 dei God bin binijimap ola wek blanga im, en imbin abum spel.*

³ Wal imbin kadimat det laswan dei brom detlot najalot dei. Det namba 7 dei na det laswan dei, en im ronwan dei blanga im tharran deya. God bin tok brabliwei blanga det namba 7 dei, dumaji langa det dei na imbin binij meigimbat ebrijing. Langa det dei na imbin abum spel brom ebrijing weya imbin dumbat.*

⁴ Yuwai. Lagijat na ebrijing bin kamat.